



溫暖的七箍銀

阮讀屏東師院四年仔的時，愛去國小實習，毋過彼時陣我參加高雄少年地方法院輔導志工的研習，所以逐禮拜三下晡攏愛請假去高雄上課。

有一个拜三，我揸真濟教具趕火車欲去高雄。上火車無倂久，火車煞停落來，等誠久攏無閣發動。後來車長放送講火車故障，欲聊聊仔駛去後一站停車，請旅客坐後一班的火車。我驚上課袂赴，落火車了後，就隨走去火車頭，叫計程車趕去。為著欲準時去研習，加開錢坐計程車，共身軀頂的錢攏用欲了矣！毋過，好佳哉我有先共欲轉去的車票買好勢。

研習有較慢結束，閣欲趕時間坐火車轉去，我才想著這聲害矣！無錢通坐車去火車頭，只好揸教具用走的去。我走甲大粒汗細粒汗，就佇火車欲開進前的幾分鐘仔走到火車頭。可能是我走甲怦怦喘，閣揸甲大包、細包，看著真奇怪。欲入月台的時，鉸票員問我真濟問題，煞害我目睷金金看彼班火車駛離開！這時，鉸票員才講：「按呢閣去買後一班！」我共身軀頂的錢攏擲出來，閣差七箍才會當買區間車的車票。我想講，敲手機仔拜託人來共我鬥相共。手機仔提起來，煞閣發現竟然無電矣！

我想想咧干焦賸一个辦法——去共人借錢。我提起勇氣，行去共一个穿白色裨仔的老阿伯講：「阿伯，敢會當共你借七箍？」毋知是感覺家己傷見笑抑是傷可憐，目屎煞雄雄輾落來，那講那哭。「我是屏東師院的學生，我差七箍袂當買票轉去學校。我手機仔的號碼是……，我一定會共錢還你……。」

老阿伯提一个十箍的銀角仔予我，笑笑仔講：「緊去買車票！」車票買好了後，我共賸的三箍提去還伊，然後提紙筆欲抄伊的聯絡方式。老阿伯講：「毋免還啦！」繼落去閣問我講：「落車了後，敢有錢通坐車入去學校？」順繼共皮包仔提出來，我緊共講我會當家己行路入去學校。

老阿伯一直攏無留聯絡的方式予我，伊可能認為干焦七箍銀爾爾！七箍雖然少，甚至嘛買無啥物，毋過對我來講，是遮爾濟、遮爾溫暖，遮爾予人感動。

作者：郭家華

☆詞彙學習☆

【放送】hòng-sàng：廣播。一種利用音波和電波傳達訊息的大眾傳播媒介，或特指廣播節目。源自日語。

【開錢】khai-tsînn：花錢、破費。

【好佳哉】hó-ka-tsài：幸虧、還好。

【怦怦喘】phēnn-phēnn-tshuán：又唸作 phīnn-phīnn-tshuán、phīnn-phēnn-tshuán、phīnn-phānn-tshuán。喘得很厲害。

【裨仔】kah-á：背心。無袖無領的上衣。

【見笑】kiàn-siàu：羞恥、羞愧。